

四庫全書

集部

欽定四庫全書

山谷別集卷六

宋 黃庭堅 撰

雜著

引連珠

臣聞一雨所濡大小之生異類一氣所殺剛脆之質不同所以聖人因物以盡性神道設教而無功

臣聞千里運糧非一牛之力梓慶成鐻非一削之功是

以賤能則智者困欲速則巧者窮

臣聞五種不美未嘗易田以耕百度凌遲何必變化而治蓋不役於物者不絕物不制於俗者不離俗是以手足以得輕重而任權衡目可以察曲直而付繩墨

臣聞人主治國在制法在擇相法不法在易相相非人下陵上是以仲尼用魯不使飲羊以誣民趙高事秦至於指鹿而欺君

臣聞析薪者求其理法古者師其意堅白則一物不察

損益則百代可知是故物有倦而思通聖人必改作事
有簡而易致道家貴因仍

臣聞宮商唱和乃知鍾律之前聖賢夙期不拘聘幣之
末故至精難以言說妙契參於自然易曰鳴鶴在陰其
子和之

臣聞舜禹不世忠邪共朝良樂未逢駑驥同櫪是以匠
石之手易揮郢工之質難得

長短星歌

正月虎七澤陰風無避處少年射殺白額歸二十一歲
賜旗鼓二月免翰墨功名歸四杜中山毛遂定從還十
九上客誰復數三月龍定力降來一鉢中昇騰便欲致
雲雨十六開士觀雲風四月蛇九蛇相輔成晉家屈原
離騷二十五不及之推死怨嗟五月馬十五國風多詠
寫漢將西極天馬來二十五城不當價六月羊十歲小
兒牧道傍他年叱石金華路二十年前身姓黃七月猴
恒山八命列封侯當年傳國二十二想是衣冠騎土牛

八月雞二妙靈臺向曉啼五更風雨十八九殘月昏昏
信可期九月狗三窟深坑四荒走暮歸得兔十六七黃
盧朱雀皆在後十月豬白頭一笑獻士夫殺身願為魯
津伯申封蘭王十四都十一月鼠列十二辰配龍虎二
十二年看仙飛一朝化作蝙蝠去十二月牛百戶椎肥
醉九州角端圍寸二十五良弓之材牛帶牛

帶一作載

論謝惓

謝惓字公靜才氣過人遠甚初舉賢良而值罷賢良平

生治春秋胸中甚落落而值罷春秋晚作鄧州職事官
值看詳訴理所言惜元祐中訴父無罪被黜褫其官棄
之士生而三不遇白髮蒼顏亦可以安林泉而不得罪
於不仕無義之論矣

論詩帖

陶淵明詩長於丘園信所謂有味其言者吾嘗見梅聖
俞誦唐人詩云雀乳青苔井雞栖白板扉聖俞甚愛此
句柳子厚詩云渚澤清泉清淵明云平疇交遠風良苗

亦懷新此句殆入妙也

戒讀書

四民皆當世業士大夫家子弟能知忠信孝友斯可矣
然不可令讀書種子斷絕有才氣者出便當名世矣

右有

石刻

論作詩文

新詩日有勝句甚可喜要當不已乃到古人下筆處小
詩文章之末何足甚工然足下試留意奉為道之詞意

高勝要從學問中來爾後來學詩者時有妙句譬如合
眼摸象隨所觸體得一處非不即似要且不是若開眼
則全體見之合古人處不待取證也作文不必多每作
一篇要商榷精盡檢閱不厭勤耳舉場中下筆遲滯蓋
是平時讀書不貫穿也宜勉強於學問歲月如流須及
年少精力讀書不貴雜博而貴精深作文字須摹古人
百工之技亦無有不法而成者也但始學詩要須每作
一篇輒須立一大意長篇須曲折三致焉乃為成章耳

讀書要精深患在雜博因按所聞動靜念之觸事輒有得意處乃為問學之功文章惟不構空強作詩遇境而生便自工耳

所諭漏屋飯蔬而有自得之色甚善甚善然猶世俗計較尺寸太多似未善也萬事不可意古人遂以成聖哲安樂溫飽君子所畏也

吟詩不必務多但意盡可也古人或四句兩句便成一首今人作詩徒用三十五十韻子細觀之皆虛語矣要

須意律諒田夫女子皆得以知之蓋詩之言近而指遠者乃得詩之妙唐人吟詩絕句云如二十箇君子不可著一箇小人也唐詩僧吟草詩云時平生戰壘農情入春田如此語少時常記百十聯思其的切如此作詩句要須詳略用事精切更無虛字也如老杜詩字字有出處熟讀三五十遍尋其用意處則所得多矣

凡人修學惟節畧今人文字似無益於用不若熟讀班固漢書自首至尾不遺去一句然後可見古人出處疑

則闕之當求明師益友以講習也王定國謫金過戎因
出數十篇文字余謂定國曰若欲過今人則可矣若必
欲過古人宜盡燒之更讀十年也定國詩極有巧處然
少本也余自謂作詩頗有自悟處若諸文亦無長處可
過人余嘗對人言作詩在東坡下文潛少游上至於雜
文與無咎等耳

讀書不必務多若能精一遂可貫諸經矣至於寫字亦
如此少寫須有常度亦不可錯也

右皆
家傳

論作字

晁美叔嘗背議予書唯有韻耳至於右軍波戈點畫一筆無也有附予者傳若言於陳留予笑之曰若美叔書即與右軍合者優孟抵掌談說迺是孫叔敖耶往嘗有丘敬和者摹放右軍書筆意亦潤澤但為繩墨所縛不得左右予嘗贈之詩中有句云字身藏穎秀勁清問誰學之果蘭亭大字無過瘞鶴銘晚有石崖頌中興小字莫作癡凍蠅樂毅論勝遺教經隨人作計終後人自成

一家始逼真不知美叔嘗聞此論乎南昌黃魯直題

數道人作大字筆勢已道勁可愛但肥字須要有骨瘦字要須有肉學古人書隨其工處今人學書肥瘦皆病又嘗偏得其人醜拙處如今人作顏體乃其粲然者江南太史氏黃庭堅書

大字今都不見右軍父子遺墨欲學書者當以丹陽瘞鶴銘字為則大字難為結密唯此書無點檢處顏魯公書宋開府碑瘦勁端重極近之

右見
石刻

學書欲先知用筆之法欲雙鉤迴腕掌虛指實以無名指倚筆則有力古人學書不盡摹張古人書於壁間觀之入神則下筆時筆隨人意大抵書字欲如人有精神細觀之則部伍皆中度耳

墨說遺張雅

曹魏時有大臣韋仲將德性高明多能鄙事其所作墨如點漆今觀其法和煤外止用丹砂大要是膠法妙墨法須自煮膠膠浸自牛皮盡割去連脂膏處又割刮去

毛毫皆上墨也片切熬成即用和煤此名第一膠若乾
取他日水解之用即名第二膠膠八水二墨成不作膠
氣使用亦不滯筆此上工也梓潼張雅不能和煤而善
作巨勝煤蜀無佳墨工如雅不易得也故喻以古人法
余聞雅亦參禪問道欲入九流然但禮拜無眼阿師隨
杜撰道人談金丹恐只虛生浪死耳

筆說

歙州呂道人作墨池含墨而鋒圓佳作也宣州諸葛家

撚心法如此唯倒毫淨便是其妙處蓋倒毫一株便能破筆鋒爾宣城諸葛高繫散卓筆大槩筆長寸半藏一寸於管中出其半削管洪纖與半寸相當其撚心用栗鼠尾不過三株耳但要副毛得所則剛柔隨人意則最善筆也栗尾江南人所謂蝓蛉鼠者歙州呂道人非為貧而作筆故能工於是以此授之黟州道人呂大淵心悟韋仲將作筆法為余作大小筆凡二百餘枝無不可人意因見余家有割餘狨皮以手撼之其毫能觸人手

則以作丁香筆今試作大小字周旋可人亦是古今作
筆者所未知也往在樊道有嚴永者蒸獺毛為余作三
副筆亦可用然永未嘗知筆中善病不能為他人作字
也大淵又為余取高麗猩猩毛筆解之揀去倒毫別撚
心為之率十得六七用極善乃知世間法非有悟處亦
不能妙

張遇丁香筆撚心極圓束頤有力可學徐季海禹廟詩
字侍其瑛諸葛元皆不能也作藏鋒筆寫如許大字極

可人意最妙是

闕

有力也

金崖石研說

初石工不善作墨池內外壁立出墨瀋難又常沮洳敗
墨元符三年二月嘉州李堯辨為予琢兩石壁皆陵夷
乃便事紹聖四年春正月雨水故人蓋明仲守萬州為
余斲金崖石作此研

瀘州桂林石研說

瀘州桂林之石其材中研瀘人不能采而富義之民采

之所謂楚國有材晉實用之工李辨琢此研窪垤皆中度

惠王子均研說

涪翁用桂林石作此研惡其太重故剗其腹至荊州以贈王子均

金崖研作覆斗說

紹聖四年正月雨水故人蓋明仲守萬州為余剗金崖石作此研堅潤宜筆墨而魁梧難為室乃作覆斗使之

不塵

封植蘭蕙手約

山谷老人寓筆研於保安僧舍東西窗外封植蘭蕙西
蕙而東蘭名之曰清深軒涉冬既寒封塞窓戶久而自
隙間視之鬱鬱青青矣乃知清潔邃深自得於無人之
境有幽人之操也余既獲謫走宜州則以蘭二本蕙八
本付寺僧文質守之幸為卒調護之有士大夫欲遷而
去者可以此券示之崇寧二年十二月丙午山谷老人

手約

金液珠說

開封祝天貺屈蜀紙麝流金液作珠逡巡而成丹服之
而痼疾起蓋此石性能溫中而實下推陳而致新陽物
也而濟

闕

明者下而成珠其

逆與石則止故不凝滯而為疽余異之誠有補於衰朽
而不疾人故書其說以遺之

棊經訣

初下十子以來進未可謀殺退未可占地各逐其宜以求有力此立理之道下及三十子以後布置稍定須觀局之強弱或占地或刑尅必觀於利此乃用行之時也殺不必須得地不必須破占不必廣此三者取捨之道碁之所切無出於勝儻或局勝專在自保或局弱即須作行然作行須是敵人有釁無釁而動必敗之道也碁之機要多在外勢取局之要在於鴻漸碁有三敗一者欺敵二者不辨局三者多錯又有六病一者貪殺二者

取捨不明三者無劫興劫四者苦覓奇行五者知微不
妨六者精勝望籌慕之大要先手不可失局初有大利
方可棄之局中有倍利方可棄之局末有不得已方可
棄之古之經訣皆述簡易貴於立理先為不可勝以待
敵之可勝或逍遙得極高道自樂終局雅淡是其長也

論俗呼字

藪

郎假切

直

音鮓

泥不熟也中州人謂蜀人放誕不遵軌轍

曰川藪直

孔子於鄉黨恂恂如也漢碑今在者多書黨作鄙恂恂
凡古人書複語則書二字今人或於字下作一點或兩
點皆非也

橙橘屬也棖兩旁長木也司馬相如上林賦曰黃江橙
棖玉藻曰君人門士介拂橙棖音太族之族武陵有一

種小橘名棖疑即今之金橘今人書橙丁鄧切為橙非是

真音真多節目也其胸次不坦夷舉事畫計務出獨

見以乖迂人為賢者也

傀儡戲木偶人也或曰當書魁礪蓋象古之魁礪之士彷彿其言行也

袈裟天竺道人衣也梵語本云迦羅沙曳此云不正色佛律云道人不得著一切上色衣當染作迦沙色此譯師書律時畧梵語也至梁葛洪撰字苑下皆著言道服也

偈

音塔 偈

音 物不蠲也蜀人語

銃

充仲切

雷 進

使令人不循謹便利也

倅

初孟切

士大夫容貌不恭順應對不雅馴也

雜論

燕人膾鯉方寸切其腴以啗所貴腴魚腹下肥處也故
杜子美詩云偏勸腹腴貴年少

醯人云羞豆之實醯食糝食鄭司農云醯食以酒為餅
賈公彥云醯粥也以酒醯為餅若今起膠餅鄭司農云
糝食菜餽蒸賈公彥云若今煮菜謂之蒸菜起膠餅蓋
今炊餅蒸菜蓋今裹鯖耶蜀人凡果蔬皆漬之醯以為

蒸餽周官醢人云醢人掌五齊七菹王舉則供齊菹醢物六十甕齊即釐也豈蜀人尚有古風耶

在旁曰惟在上曰幕四合象宮室曰幄坐上承塵曰帟凡言設大次小次者皆帷也大次在壇壝之外小次去壇遠矣

凡言貨賄金玉曰貨布帛曰賄貨自然物賄以人功乃水鍾曰澤澤無水曰數

上於下曰賜下於上曰獻若尊敬前人雖上於下亦曰

獻通行曰饋上於下下於上及平敵相與皆可曰饋

大司徒里宰以歲時合耦于耜鄭康成云耜者里宰治處若今街彈之室於此合耦今昆陽城中有漢街彈碑

助耜音

土訓掌道地圖以詔地事道地隱鄭康成云地隱若瘴蠱然賈公彥云瘴即瘴氣出於地也蠱即蠱毒人所為也

保氏教國子六藝三曰五射四曰五馭鄭司農云五射

白矢參連剡注襄尺井儀也五馭鳴和鸞逐水曲過君
表舞交衢逐禽左賈公彥云白矢者矢在侯而貫侯過
見其鏃白參連者前放一矢後三矢相連而去也剡注
者謂羽頭高鏃低而去剡剡然襄尺者臣與君射不與
君並立襄君一尺而退井儀者四矢貫鏃如井之容鳴
和鸞者和者在式鸞者在行升車則馬動馬動則鸞鳴
鸞鳴則和應逐水曲者御者逐水勢之屈曲而不墜水
過君表者錫纏旃以為門間容握驅而輦則不得入舞

交衢者御車在交道車旋應於舞節也逐禽左者御驅
逆之車驅禽獸使左當人君所射凡君自左射故公彥
又云此當先鄭別有所見或以義而言以義而言則不
可見別有所見則可又不知公彥何依據如是訓釋也
小宰云聽買賣以質司市云以質劑結信而止訟質
人云大市以質小事以劑鄭康成云質劑為兩書一札
同同而別之長曰質短曰劑若今下手書賈公彥云漢
時下手書若今畫指券豈今細民棄妻手摹者乎不然

則今婢券不能書者畫指節及江南田宅契亦用手摹也

太祝辨九擗擗即拜也一曰稽首拜頭至地也二曰頓首拜叩頭至地也三曰空首拜頭至手所謂拜手也唐人書末言謹空蓋空首也九曰肅拜但俯下手若今時擗

於至反

又曰介者不拜左氏云為事故敢肅使者又曰推手曰揖引手曰擗宋子京別紙多云伏奉手畢南人謂筆為畢因效之蓋以為手筆耳子京乃謂手簡爾雅

簡謂之畢學記曰呻其佔畢

上古之人夜則伏常苦恙蠱食人心故晨興相見輒相問言得無恙乎

左思蜀都賦云邛竹緣嶺菌桂臨崖旁植龍目側生荔支故張九齡賦荔支云雖觀上國之光而被側生之誚老杜亦云側生野岸及江蒲不熟丹宮滿玉壺雲壑布衣鮐背死勞人害馬翠眉須也龍眼惟閩中及南越有之太冲自言十年作賦三都所有皆責土物之貢至於

言龍目亦不自知其失也雲壑布衣蓋言臨武長唐羌也左傳子產曰寡君之二三臣札瘥夭昏大死曰札小疫曰瘥短折曰夭未名曰昏

右皆家傳

荀卿云蠲六跪而二螯其實八跪也蓋古人作語時有省不省耳揚子云螭螭郭索蚯蚓黃泉語約而寡過也

右有石刻



山谷別集卷六

欽定四庫全書

集部

山谷別集卷七至十

詳校官庶吉士

臣胡鉅

檢討臣何思鈞履勘

總校官進士

臣朱鈐

校對官編修

臣勵守謙

謄錄監生

臣張和

欽定四庫全書

山谷別集卷七

宋 黃庭堅 撰

疏

聖節功德疏

天降真人撫世而百神受職帝臨諸夏嚮明而萬物資
生罄率土之歡心奉同天之令節祇臨普供法施圓成
伏願皇帝陛下聖德日躋神功時邁文明在御同符十

方之尊福祿來崇茂對三祇之永

祭醮疏文

惟上帝垂高明之鑒於萬物有父母之心日月照臨不
漏絲髮雷霆作解滌除咎愆齋戒之誠物或微於一勺
疾痛之苦聲必達於九關雖三災彌綸俯存行業而一
心懺悔仰望慈雲伏惟左右萬靈清明同德普垂孚祐
曲庇餘齡

玉山祈雨文

謹以清酌時羞之奠致告于玉山之神作鎮此邦能出
雲雨食口十萬實依神休乃六月交稻方水耨旱乾無
澤西南其風雨將愆期民則無歲怨嗟盈野豈神本心
某職思其憂敢用控告神其呼吸明晦風馬雲車行天
作霖百里多稼享民報事豈不休哉

智海禪院大殿功德疏

華岳三峯基從累土舳艫千里源發濫觴積之豐屋蔀
家求者繫風捉影及此天臨日照誰不舉手低頭大衆

今日一會還當得佛事也無若道當得為甚麼諸人開
眼不見佛若道當不得太平上座草鞋拶笠踏破紅塵
可不是佛事朱邱居士及諸檀越信手拈來盡成金碧
可不是佛事堂中清衆髻除補洗之餘化為天蘇陀饌
可不是佛事雖然諸人各各將來杓柄輸他典座不可
酸嫌裏敲不著不托裏撥不著去也直須剔地成紅三
就作禪臘月二十二特地滿城春晨鐘暮鼓兩足尊千
秋萬歲聖天子謹疏

智海塑造佛殿功德疏

畏鷹之鵠依佛影而清涼失水之魚聞法音而解脫故
此如來名相皆為入道門庭但能隨喜莊嚴悉受當來
記別四山相逼三界無安象教之中法檀為上

慧林修寢堂僧堂疏

百丈中天之臺基初於累土萬牛回首之木可致於通
津總其成功實出衆力今此方丈之室安衆之堂取辦
一時或墻高而基下閱茲十稔既上雨而旁風能令鼎

新付在檀越夫沙門者剃頭洗鉢坐夏過冬身如浮雲
何有定所雖然老翁種木成陰以待後人貧女獻花遇
緣不可空過

和州褒禪溥長老開堂疏

法法不隱藏諸佛尋常出現人人自具足祖師所以西
來正為門外貧兒天然外道自無分珠宮貝闕只認得
馬後驢前要須本色衲僧指出現前佛性慧空寶剎舊
店新開竊聞長老溥公積玉藏輝自埋於俗法雲澍雨

今正其時水是水山是山提起雲門拄杖行即行座即座截斷褒禪脚跟不惟驚法海之魚龍亦以潤太平之草木

請黃龍慶老疏

大乘講師面牆頓教小根魔子裨販如來邪法崢嶸如惡叉聚正宗淡薄如指爪泥病在膏肓藥資瞑眩況黃龍山者無生師子之窟不二旃檀之林超慧之海潮雷聲宗徒所記南老之佛脚驢手野老猶傳來坐道場屬

當先覺竊惟長老慶公提諸佛正印是衆生醫王而目
視雲霄陸沉丘壑諸方勸請堅拒不回宴坐十年草深
一丈是必能射不射之手為無為之功若然者三七日
中能仁即非聖事五十六億慈代不當下生伏冀開枯
木之花重光祖席發窮源之水大布慈雲於此同時但
沾法味

代蘇魏公以因聖寺為報親院請主僧疏

因聖得名舊矣報親自天錫之山月林扉或改衆人之

觀粥魚齋鼓豈異向時之聲舊住長老澄公透黃龍之
三關用臨濟之一喝獨以道為伴侶不隨世而陳新瓶
水爐香終借松楸之潤曉猿夜鶴將從杖屨之遊所冀
謙光曲從勤請

雲巖律院打作十方請新長老住持疏

雲巖打作十方新長老來住道場麒麟不可捕狼驅除
分付當行量才補職宜辨真假監院庫主直是官不容
針知客維那又要私通車馬首座必能伸於千夫之上

典座又須屈於萬夫之下處處積炭堆柴方可過冬過夏澆茶必須熱湯澆浴亦是瞎堂細鉢飽炊飽湯簾鉢去皮去糠響板木魚聲絕食桶乃可過廊不能為眾竭力典座却是大伯但知勤惰功過局頭付在典座若得冬溫夏涼長老端坐法堂還把家家拄杖浩歌一曲歸

闕

華嚴修造疏

遍照如來世界海寶嚴宮殿趙州古佛三十年折脚繩

牀道不虛行理惟一味此華嚴禪院者昭陵皇帝百福
所嚴毗盧遮那一會如此而丹青黠昧土木歆傾屬在
檀那崇茲佛事夫沙門法者終日喫飯不破一米終日
著衣不掛一絲縱令法席重光不動鎮州一草若有見
聞隨喜功不虛捐當令大衆為白牯狸奴念摩訶般若
波羅密

慧林齋僧疏

九年面壁難為作者當仁十會談經且下菩提種子若

生正念即見如來故以受持讀誦而助宗乘牀敷飯食而作佛事轉八萬經卷觸目文殊普賢營百千僧齋不擇旃陀舍利普願十方檀越同發此心

乞浴疏

掃除溫室鑿玉開種福之田忽悟水因童子納破塵之印皆從願力登濟聖功設欲薦彼沉淪懺波羅夷罪或為祝延喜慶作阿彌陀因即布七淨花具功德一滴之水普遍莊嚴仁者俱能發心如來無不實悟

青城山方廣院求化疏

方廣道場昔香林遠公常於此處大作獅子吼今楊枝
之孫純公應緣出現照破野狐窟此兩箇没用處漢是
平等無心道人鍾鼓之音震驚百里粥飯之供蔭覆十
方凡為當來龍華三會聽法之人隨喜結緣物無多寡
經云供養阿羅漢千人不如供養一無心道人如來妙
語真實不虛汝等施心功德無量

為僧求化三衣疏

一人若披佛衣三族不墮地獄所以捨在家煩惱緣受
檀那清淨施攝十方同人正念雖萬金不枉秋毫隨意
必能生喜知恩決定報恩

乞冬炭疏

道人家風滴水滴凍坐則蘆穿膝立則雪齊腰雖然凡
聖同居事無一向要且拆籬補障共過三冬一句曲為
諸人遇緣不可空過

黃龍山設浴疏

二月十二日山谷道人施清衆溫浴一堂金粟老人道
八解之浴池定水湛然滿布以七淨花浴此無垢人且
道無垢人又浴箇什麼於此悟得不妨冷暖自知其或
未然請問木皮居士

設浴口語

根塵不偶空水無依從本光明誰為垢淨我今施茲八
功德水浴此大修行人處婆娑界中順如來法事然願
同袍衲子隨喜白衣皆嚴妙觸之華不染戒香之印受

斯法施介我壽祺恭惟大覺證知

祭文

祭司馬溫公文

嗚呼篤生溫恭不愧于屋漏守死忠蓋可薦於神明惟天下信公不疑惟公以天下自任三后在上照知赤心兩宮臨朝眷倚黃髮四海岌岌未知息肩公執樞機重宗社于九鼎公定國是決興喪於一言所進忠賢拔茅連茹其去姦佞跡無遺根涇渭洞明凜乎太平之漸雖楊

太尉晚慕而志愈篤山司空中立於朝甄拔人物楊文
簡扶挾以對延英汾陽徹樂中丞毀堂崔文正肩輿至
中書除吏八百考公名實可謂兼之嗚呼晷月之間經
營見效如此尚假日月汙觀崇成如何彼蒼殲我哲輔
有身可贖誰不願然謂天不慈以公雨泣惟時訃聞兩
宮震動帝臨明堂受釐不賀未足以盡哀公之志上公
開國樞以貂蟬未足以盡顯公之心人之云亡邦國殄
瘁爰輯斯文為天下慟悲不能詞公尚饗之

祭司馬諫議公休文

嗚呼公休重厚而明惠和而清小心畏義臨淵履水學問醇一宜在君側執經二年獻納是力內行孝恭金玉其躬廩粟笥衣惠于九宗昔文正溫公弼亮二聖勤勞而隕遺我後慶補袞之闕再有王命曰其忠清獨似先正公休盡瘁不敢告勞輟食賜金尚其能朝太醫技殫疾殆不起聘醫於魯魯有老李醫稱耄老不能千里民勸就馬曰吾相之子九月訃聞兩宮驚歎秩諫大夫寵

銘其旌不忘忠清又厚賻之其丘其孤俾護之朝思良
臣士哭畏友嗚呼吉人胡不黃耆銘旌飄飄無復平生
祖行以觴有淚縱橫

祭外舅孫莘老文

嗚呼萬物汙汙隨川而東金石獨止何心於逢天地雷
雨草木爭長松栢不春以聽年往惟公豈弟而勇沉足
以制羣輕之命重遲而志厚可以寄不御之權若拙也
而巧於慎獨之行若訥也而辯於得意之言孝友蒸蒸

內行玉雪律貪敷薄無有玷缺心醉六經仕則面墻公
為郡邑禁止令行往在熙寧弼臣造膝誣公懷姦不工
應卒公蹈其機寤乃自陳人言公枉我則觀仁雖疾猶
美如西子顰元祐初政公又大諫不忤不侵一作體國

而論公於相士如九方臯遺其皮毛論其絕塵凡在縉
紳多自公出轅下千里皆載稱述公侍母疾結帶三年
勞勤恐憂鬢鬚皤然流落歸來公亦既病猶望公起典
司國柄去歸淮南公病益侵人物眇然我憂其深二月

丁酉公擇去化厥明戊戌公亦命駕邦國殄瘁詩人永懷失二長者我心險哀我初知書許以遠器館我甥室飲食教誨道德文章親承講畫有防有範至今為則小人有親又有官箴公喪不臨斂不撫衾遡風實涕亦隕我心維當絕絃以報知音平生斗酒同此臭味敬奠以聞其舉斯觶

將葬叔父給事祭文

嗚呼叔父躬行之節足以律貪敦薄立朝之義足以尊

主庇民雖陰功隱德潤澤天下之半於叔父之志百未
一伸歲在壬申天殲德人病不能朝牖下拖紳啓手啓
足無媿明神皜乎其白不可溜確乎其堅不可磷我欲
歸怨於人與人無惡我欲歸怨於天天既生德尚有遺
美與世作則挽車在行無淚續哭松柏降霜臨穴惴栗
我等在世百身何贖終天一觴心隕于谷

代四十五弟祭伯父給事文

嗚呼我少不夭從母霜露終歲歸只又失所怙幼小近

市未聞詩書不知母慈不如烏鳥越在田間瞻望千里
金玉之音言提其耳手足之故飲之食之教之誨之維
我伯父沒身之澤尚以榮我童負丘山幾何不墮伯父
之教終不可忘入則在室升則在堂自今至于後日束
身脩行不瘵于官我母之慶思孝思純旨甘溫清有違
斯言天實殛之酌酒隕心終天一辭

叔父十九先生祭文

嗚呼叔父孝恭慈仁足以助鄉官之化明哲淑慎足以

追大雅之風數術窮天地而談萬物之宗學問貫古今而參百慮之致先生既無求於世世亦無求於先生所以耄老詩書陸沉丘壑功烈無述文章不昭豈不悲哉昔在田里侍坐從行飽聞金玉之音實入芝蘭之室清規映俗孰能磷淄和氣格人不以聲色子弟之過不畏鄉評而恐達先生之耳邑里之訟不之公府而求直先生之庭維先生匿智韜光就陰息迹惕畏幾於數馬清慎過於辭金見賢思齊如將弗及聞人之過默而識之

故能上下之交纖介無悔耆父之歲宴安就閒致功巖
穴之間不復經綸之夢謂當康彊百歲保我後生不圖
既凶日月遄盡誨言在耳叔父何之酌酒盈觴不見平
生之笑語霑泣伏地豈其黃壤之聽聞哀哉奈何尚饗
代祭王朝議文

維元豐六年歲次癸亥十一月壬寅朔七日戊申趙郡
李氏二姨謹以清酌時羞之奠致祭于故提舉朝議姨
夫之靈惟君孝友敦睦刑于室家信厚忠純載在婚友

恤孤振乏設心慈仁問道好賢不遇聲色宦學自力廉
能顯聞嶺南五郡去思猶在謂宜黃髮以庇本支厭世
去仙中壽而止惟我女弟早乘魚軒抱攜孤孫哀疚何
忍婚姻之故酌以告別皎如平生尚克來饗

母壽光縣太君祭非熊文

維元祐四年歲次己巳三月壬申朔十二日癸未母壽
光縣太君李氏以清酌時羞之奠致祭於幼子二十四
郎之靈嗚呼康州捐館汝在懷抱從我難厄餬口四方

以余嫠孀致汝昏晚命之奇蹇趙氏不減既壯而鰥六
見寒暑擇對齟齬迄以無家予負於天令汝暴橫心摧
肝裂何地寄哀白日昭昭棄我何適維汝乳母乳我三
子皆不中身禍酷如此汝念乳母在後而單我尚撫之
如三子存吾年七十眼暗足跌汝歸殯宮不得臨穴拍
棺一慟淚盡唯血嗚呼哀哉

代兄祭非熊文

維元祐八年歲次癸酉正月己卯朔二十九日乙未兄

大臨以清酌時羞之奠昭告于亡弟非熊之靈爾競豪

爽快才不

闕二字

可以亢宗聞之先親稟命不融不能中

身容土風露草

闕一字

既陳痛我手足我哀如新我等不

天安康棄養以爾同歸及茲大塋臺平之原先君所卜

其杉其松竈以昭穆二月戊申安康祖行爾亦就次思

如平生別酒一觴有淚從橫

右皆家傳

祭園明大師文

先生有與元陟贊府書中云園明塔銘祭文中已具之者銘中更不

復出

也

維元符三年歲次庚辰九月甲子朔初四日丁卯山谷
老人黃某敬以龍茗水沉時菓齋蔬致祭于故園明大
師無演公之靈曰嗚呼園明萬人之傑千人之英向使
為儒師友琢磨庸詎不為子雲長卿向使為吏為師為
長庸詎不為翁歸張敞蚤被佛縛於師有光筆端舌本
什公支郎以檀嚴佛能軒能輒不作則已作必賦世文
章記問圖畫書詩人一為多獨能兼之一朝棄家天脫
其羈浮江下漢訪道求師譬如蒼龍蛻其大身留體一

髮卷藏自珍往雖出家日用世瀟作無義語覆不淨業
行求正眼還我光明作為雷霆以雨四溟方行萬里出
門折軸清明粹溫今見朽骨歸船雨泣天容泔泔我羞
清供如公初心尚饗

彭城叔母祭文

嗚呼昔在叔母有齋來繫婉德主饋人無間言娘子孝
友令承几筵中身不考何罪於天天涯聞哀不能駭奔
匱旌東來哭於國門遷次十年客非吾土雙井之原今

復其所某等幼小撫憐備聞教語音猶在耳瞻仰無處
哭輓靈車淚落樽俎

祭樂夫人文

嗚呼夫人禮足以承祀義足以託孤風雨抱雛迄今燕
居我有息女往奉盥櫛夫人慈之如女在膝不見顏色
今二十年淮安之下卜維新阡山川悠遠不聞哭輓千
里牲酒以寄繾綣

十八弟新婦裴氏祭文

嗚呼夫人徽柔懿恭承親祈祈諸婦率從謂當有子以
允我宗如何不淑奄忽覲凶我與汝父兄弟朋友昔見
襁褓今見旌柩恩情之痛倍絕倫等撫心祖行以文薦
酒

十九弟新婦李氏祭文

嗚呼惟舅氏之玉女徽柔順從歸我季子家人相慶宜
受象服以蕃子姓如何不淑逢此百凶兒隕于祿遂弗
寤興平生家庭言不出口臨絕之音甚義而禮孰予之

美而奪其齡臨觴一哭誰不失聲嗚呼哀哉

又將葬祭文

嗚呼夫人舅氏季女黃芝紫蘭潤澤露雨選對一時歸
我季深似不能言家人歸心有子不淑身亦夭橫生人
之痛哀可隕性昔在舅氏育我諸孤視爾兄弟繁然不
殊臨喪一慟痛在手足酌酒祖行瘞此佳玉嗚呼哀哉
祭十一舅母安福縣君范夫人文

嗚呼夫人令德孝恭佐我元舅肅雍於宮柔不選懦剛

不忌克誰傳誰師金玉天質螽斯多子扶牀坐膝笑之
怒之慈視如一夫人歸止不及皇姑事我安康進掖退
扶酒肴枕簟溫清起居婦拜姑老尊重則傲猗嗟夫人
老而克孝誰不淑壽大國楚秦孰是夫人而不中身兒
皆詩書女亦箴紈得喪秋毫彼亦何卹庭堅等來自江
南哭奠藁葬毀瘠餘生哀深母黨

山谷別集卷七

欽定四庫全書

山谷別集卷八

宋 黃庭堅 撰

行狀

叔父給事行狀

黃氏本婺州金華人公高祖諱瞻當李氏時來游江南以策干中主不能用授著作佐郎知分寧縣解官去游湘中久之念藏器以待時無兵革之憂莫如分寧遂以

安興奉二親來居分寧因葬焉公曾大父及光祿府君
皆深沉有策謀而隱約田間不求聞達光祿聚書萬卷
山中開兩書堂以教子孫養四方游學者常數十百已
而仕於中朝多鉅公顯人故大夫公十伯仲而登科者
六人凡分寧仕家學問之原蓋皆出於黃氏公少舉進
士有聲場屋間登嘉祐六年進士第授宣州司理參軍
治大獄亡慮百數無不得其情公去官老獄吏嘗竊歎
息以為獄官能盡心於治獄不可欺以秋毫仁厚精密

前後未見其比移虔州會昌令治公家如營私視民病
如在已會昌民健訟善匿情成獄戶婚事多久不決公
開導教勸之待以恩意因鉤索其曲直久乃皆服其治
大獄多可傳道蓋世稱仁厚吏者徒苟欲生之公則不
然曲折務盡其情要使不冤然後已故會昌民至今思
之改祕書省著作佐郎知鄂州崇陽縣未至丁母夫人
蓬萊縣太君徐氏憂服除江淮發運使張頴舉充勾當
公事未行或薦公於王荊公荊公召至中書問免役法

公以但知舊法牙規對荆公問甚悉曰能留心舊法必
能辦新法矣薦於上遂為司農寺勾當公事召對便殿
訪時事公對曰陛下意在惠民法非不良而患在奉法
之吏多非其人朝廷立法之意則一而四方奉法之意
紛然不同所以法行而民病恐陛下不盡察也河北郡
縣被水河東河南京東西皆旱淮淞飛蝗蔽野江南疫
癘恐陛下不盡知也遂命公同司農寺丞程之才體量
河北河東災傷賑濟道除知司農寺丞公以荒政十二

為科條州縣可行者以付守令其大者或請或遂務以
濟民不專於黜不職之吏立威而已歸報使事又言所
見民間不便於改法者數條明白上謂執政曰黃某忠
厚可使除太子中允利州路轉運判官既行就差提舉
秦鳳等路折納欠負公一聽輸粟優估其直凡折納五
十餘萬召為司農都丞異時命陝西轉運司為兩路移
用常苦不足公議兩路賦入薄厚事權重輕皆不侔使
者各為備邊之計偷自便而已其移運糴買勢必相傾

故每告乏請復通為一路後卒如公議除監察御史裏
行熙寧十年七月也公疏言一人之智不若十人十人
之智不若百人此有餘不足之辨也成天下之務莫急
於人才願責兩制近臣監司郡守各薦所知一人陛下
因所舉而任之於其能否成敗之際亦足以知天下之
大吏所以事陛下者上用其言敕內外待制以上臺諫
官三路都轉運使至諸路轉運判官各舉才行任陞擢
官一員於是應詔者百餘人公又疏言勢孤地寒遠跡

下僚者既得以名聞於上願詔中書審察其能而用之
則急才之詔不虛行於天下又疏言自五年以來天下
水旱下戶實蒙支貸倚閣之惠今幸歲豐有司悉當舉
催久饑初稔累給併收是使百姓遇豐年而思歎歲乞
定諸路舉催欠負上二等戶三分收二下三等戶收半
仍飭官司聽民折納又言都檢正俞充結中人徼幸富
貴不宜使佐具瞻之地并言王中正任使太重恐為後
憂又面論之甚切上曰人才蓋無類顧駕御之如何耳

公對曰雖然漸不可長聖人長駕遠御故四凶在朝不廢時雍彼皆才器傑然過人任使稱意為後世慮故放殛之耳上曰且置此事河決曹村京東尤被其害今以累卿遂充京東體量安撫公條舉百餘事大略疏張澤灤至濱州以紓齊鄆而濟單曹濮淄齊之間積潦皆歸其壑郡守縣令能拯災養民者勞來勸誘使即其功發倉廩府庫以振不給水占民居未能就業者擇高地聚居之皆使有屋避水回遠未能歸者遣吏移給之皆使

有粟所灌郡縣蠲賦棄責流民所過毋得征算使吏為之道地止者賦居行者賦糧憂其無田而遠徙故假官地而勸之耕恐其殺牛而食之故質私牛而予之錢棄男女於道者收養之丁壯而飢者募役之初水占州縣三十四壞民田三十萬頃壞民廬舍三十八萬家卒事所活飢民二十五萬三千口壯者就功而食又二萬七千人得七十三萬二千工給當牛借種錢八萬六千三百緡歸薦士大夫後多朝廷所收用也差同結絕相州

獄事初相州事發於皇城卒事十九不實知雜御史蔡確鍛鍊成獄以此自媒中丞鄧溫伯御史上官均上疏論之溫伯又在經筵造膝而論確耳目長具得溫伯均所言又善伺察中人主意即論溫伯均朋黨為邪與罪人為地又任殘賊吏目引諸囚如使者慮問狀稱寃者輒苦辱之有人情所不能堪及上遣黃履李舜舉按狀而囚以為如前皆引服於是天子不疑確而溫伯均皆得臯均猶獨上疏爭之公至未幾而具獄上矣公嘗謂

子弟吾失不極論此獄甚愧於上官御史也提舉南郊
事務斟酌損益為南郊式二十卷監試國子監開封進
士奏增損貢舉式進士以為便已事對便殿言近歲雖
以經義取人大學諸生文章體制未能近古大率集類
章句聯屬對偶風傳四方謂之新格不禁其漸文章反
陋於作詩賦時乞申敕教官稍令務本以採學者之原
改集賢校理判尚書刑部賜緋衣銀魚元豐三年權發
遣河東提點刑獄兼提舉義勇保甲明年秋召閱澤州

保甲補官者五十八人特改一官八月麟府軍興兼權
轉運判官又差定代州地界公條具曲折為十二寨圖
以進具言建議者以分水畫界恐地勢不能盡然啓豺
狼心失中國險固其後遼人果責分水之言包取兩不
耕地據有形勝下臨鴈門父老於今以為恨及王中正
發軍興皆用一而調二其數皆千萬計或非所急或非
所用轉運使陳安石計不知所出奉行唯力恐不辦或
增調之一道騷然百姓胥剥至骨公為言主將非其人

其勢必敗事而軍興雖罪死斟酌事宜使不乏而已何
忍自竭根本安石字謂公夷仲安石業老今日但保首
領歸安能顧惜待制其任國家大計蓋如此公每為中
正言朝廷大體民命重寄贊道其所長稍稍規之初雖
樂言不以為忤及將出界取公錢鉅萬為特給中正父
子多自予餘以差給凡在軍者公為言斂天下以奉一
方皆出於不得已願更為縣官愛惜中正始怒是時隨
軍使臣員二百多請託徼幸成事或父子兄弟皆在行

中正已取其半莊公岳趙咸將漕隨軍公在塞內主饋餽餉欲部分使臣護道路而中正所取之餘盡隨公岳咸無在者師去界已百餘里移文追之皆不報公為勾當公事孔文仲當自馳往取之夜置酒與文仲訣文仲泣曰公行軍外事不可知使臣自從軍非公責也公曰王事當計成敗豈但塞責耶從十數騎盡夜追至軍中正等皆大驚公罵公岳咸取使臣五十餘復歸因上疏言大軍必無功未有以善其後乞募民入芻粟實塞下

得以補官及一切除罪少寬近邊百姓已竭之力已而
大軍潰歸中正歸罪轉運司應副乖方且言黃某不肯
協心同力上遣御藥竇士宣簿責乖方十事公以書對
稱死罪皆實有之繼遣開封府司錄喻陟就潞州置獄
安石以應副漕輓免就獄公獨對吏月餘但坐奏請張
皇降一官在職如故師出以元豐四年冬降官以五年
三月是冬以絳州王達羣聚阻山橫行劫略達張紅繼
以入縣鎮奉詔督捕盡十二月悉輔斬之六年六月還

所降官又以教保甲應格進一官詔按邊州違法透漏
事至嵐石州道遇苛嵐軍流民經略司奏請已被旨給
路糧遣還本郡而老幼二千餘口號泣於道擁公馬首
自言昨以與多糴貴覓來就賤分鋤一夏麥已見穞粟
已立苗願及分田乃歸公即慰諭移嵐石州未得發遣
立為奏入內侍省遞其言所問實情如此臣不敢以憂
非其職為嫌改朝廷之成命為罪竊惟老小二千口不
得其所陛下必為之動心聞數日遂得報可其請十月

罷提點刑獄為權發遣同提舉保甲視轉運副使八年
九月詔以明年正月罷赴闕司馬溫公言閒居往來陝
洛間聞河東民言甚美因熟問治狀呂正獻申公亦言
河東軍興邊民德公甚厚顧朝廷不盡知耳公在河東
六年未嘗乞赴闕雖在團教場未嘗易儒服故在陝西
河北獨不賜戰袍元豐未他路保甲擁兵入縣鎮賊殺
官吏羣盜通行數州獨河東保甲不為犬吠之盜元祐
初除尚書戶部郎中治左曹二月差按察成都等路茶

事兼體量邛州蒲江鹽井利害先奏罷陸師閔所行公
私甚病者乃具奏曰臣奉被使旨所至訪求利害至熟
權茶之法實有害於川陝之民蓋官司不原朝廷立法
本意希功幸賞以得為多於是禁網滋繁百姓受弊陸
師閔立法最虐故取利最多上累國體下斂民怨中外
臣寮所言茶事害民六科皆有事實若遽論之不若盡
以予民使園戶自賣商賈自販官收稅引及歇馱錢並
復熙寧以前傳馬法兼無交易之煩無脚乘之勞挾去

故弊一從私便無復異議若致詳於公私之際則先當
議民其次商賈其次邊計利害各有所在也今蜀民通
患幣輕錢重商旅齎攜息不償費若不捐攤茶盡與商
賈則百貨未能通流脚乘未能猝備非唯園民之貨鬱
滯絕其資生之路若蕃市交易萬一不繼亦足以害經
久之法今若捐十一州之茶與商賈仍以川陝四路及
關中諸路與之為受茶之地宜若可以盡泄川茶以補
蜀民久困而官以善價取雅州興元府所產以贍熙秦

諸州酌中法以為邊備於理為可於是朝廷許同轉運司盡公私之便商度立法公又奏曰產茶之地盡在川路賣茶之地全占陝西其發至陝西六路者為綱茶權於川陝四路者為食茶若產茶之地除去權賣侵刻取息太重搜捕苛擾差雇不和配賣賒欠預俵折納濫賞諸弊則賣茶之地隨事制宜其目有六一曰路分全占陝西州縣又權取京西之金州以東南望之疑若專利太多以天下觀之阜通川陝之利以備邊而不病東南

則勢均矣故以熙河秦鳳涇原為禁茶舊路以永興廊
延環慶為通茶新路不禁舊路無以制蕃市不通新路
無以便民欲使通塞常相權則公私可以共利二曰賣
茶給厯抑配及官賣末茶今盡除宿弊又禁南茶無入
陝西使川茶常不失中價則民不知權茶之害三曰茶
色不等蓋漢茶食嫩蕃茶食老雅州之名山自蘭州火
邈川至于于闐興元之大竹自階州入歐家自河州入
木波洋州之西鄉茶自河州入木波至于三耶龍谷今

區別茶品以入諸路則可以適漢蕃所宜四曰價直騰踴則害馬價今以茶馬相宜以斤對寸高下適等矣因宜增損則可以制邊備之費五曰博易奪市易之權汙吏撓法法不可為汙吏廢今邊市博茶大者在馬其次金帛去貪者之害乃可以通邊市之利六曰脚乘不均蓋緣軍興脚乘踴貴故高立雇直遂以諸場所博汙濫之物高價估折今若斟酌高下損其餘以資鋪兵則可以均力使之任并定博馬歲額以萬八千匹又奏蒲江

鹽事云印鹽舊價太高已蒙朝廷權減斤為八十五錢然汙雜濕惡積弊未除今欲止絕汁淋灰土及煎膽水止用九井正水煮一色鹽用權減價為定法專用食印州禁外來官鹽及小井鹽其汁淋等鹽八百六十二斤乞於正額除之仍寬鹽戶舊欠十分除二分印民數十年之病於是悉除所奏皆即施行除直秘閣權發遣都大提舉成都府利州陝西等路茶事兼提舉買馬監牧公事以職事入奏落發遣字朝論以宰府官屬當得中

立不倚之士為助以公不附會朝廷必廢茶法已而公
私便之故二年十二月除尚書左司郎中公語子弟昨
按察川陝茶政隨事制宜便於公者不苟去以為名害
於民者不苟存以為利論者未以為然是歲遂代前官
領茶馬事前日所以繩治人者皆身當之在職歲餘法
無寬闊不可行者士大夫乃頗見信故知無心以制事
利害則合而聽之在人人在已無間然矣初陸師閔時歲
計茶息以一百二十萬緡培克斂怨無所不至歲乃得

二百萬緡及公將使事盡除公私之病比數年亦得百二十萬也四年十月除起居郎知公者賀曰公學問文章宜任論思獻納而經營四方餘十五年從此乃得塗轍公謝曰王事内外一耳豈敢有擇耶五年六月權中書舍人九月遷集賢殿修撰樞密都承旨公言比歲累進官無功狀固辭不敢就職乃以修撰充陝西路都轉運使賜紫衣金魚陝西徂習軍興帥府常侵漁歲計金帛監司為軍興時柄在帥府欲按舉則掣肘故瘖不治

公痛以法繩治大府責其逋負六年十一月除給事中
七年正月就職於是數月無除拜所駁奏法令二十餘
事皆見聽自詔絕夏國歲賜邊臣往往邀功生事間小
入鈔略雖亡失過當匿不以聞及幸勝論功則上下相
蒙以冒賞朝廷既治通遠軍上首虜不實當之罪罰金
公駁奏不聽因復言今日閱實邊臣功過止用保明文
字而上功狀故不以實則無功者論賞死事者不見哀
卹軍律漸隳何以禦侮縱未特行貶黜宜自朝廷申敕

法令以懲後來五月戊子病疽甚卧家求致仕不允丙申不幸捐館舍知與不知無不哀悼詔給賻賜有加焉假官舍庇其諸孤下所屬調護葬事娶劉氏尚書屯田員外郎致仕渙之女封彭城縣君先公歿十年子男四人曰叔豹遂州司理參軍曰叔向太廟齋郎曰叔夏舉進士曰叔教封丘縣主簿女三人長適承務郎李遂餘在室有文集十卷奏議二十卷公讀書常自得意以為學問之本在力行所聞而已不憚改過自新善用規諫

之言一言而善終身紀之其於不義小心畏避人笑其
怯見義而行膽氣烈烈無不歎息平生忠信孝友自以
無負於上下神祇張頴自江淮入奏計與丞相吳正憲
公語東南水旱意以為病新法正憲公至上前道之已
而上參問自東南來者皆曰無有有詔治語所從來頴
窘甚召嘗所與往來者計之莫敢過頴者召公而公至
頴問曰計將安出公曰士大夫豈効兒女輩語人前墜
之耶今所對者天子大臣嘗言之不可食未嘗言不可

強服頤乃釋然用公言得罪亦不深悔公天資潔清非其義雖飲食之物不虛受也到官必推廩給圭田與前人然後就職罷官必亟解職推廩給圭田以與後人自少長行之不變及為大吏廩給於法疑必辭厚而取薄非矯揉為之心安而性服之也劉夫人沒後家事盡付諸子未嘗知有無旁無妾媵寢室蕭然惟書冊而已舉吏六百餘員必問能否不行請託其舉擢有罪小贓汙時見縱捨至酷吏殘民必擊去之在河東時過正平縣

有民扶老嫗自言尉疑我竊盜笞掠我今母子共有三足指存問尉曰高士造以疑執訊此母子有實即奏罷之曰不去士造無以謝此兩母子之辜屯留令司馬宏溫公兄之子右丞相范公之壻也望公薦拔公察宏為吏尚奇怪立誹謗木聽民言然及其縣吏民困於威虐皆無完膚即召宏數之曰不能改且奏罷若矣劉昌祚知代州役壯城卒繕官舍一卒墜地死監司會議欲案其罪公曰昌祚才器必為名將諸君幸緩其小過且為

諸君因行案之公至代閱昌祚吏治軍政甚修方略耳目足辦邊事因作薦章極口稱道之故事遂已公之奏舉人皆此類也諸孤將以今年九月奉公及劉夫人之喪合葬於分寧縣雙井之臺平大夫公之墓次方求當世之君子位光顯而其言立且知公之表裏者為之銘以傳信來世庭堅越在衰削哀不能文公之遺事多所散軼追次其在者廣記備言以待來擇謹狀元祐八年五月某日第九姪庭堅狀

宋故宣州觀察使贈太尉和國公趙公行狀

公諱克敦字公厚按屬籍公於今上為從伯祖父乾興元年母原武郡楊夫人生於秦邸天聖九年賜名授左班殿直三遷為左侍禁景祐二年園丘禮成換右衛率府率歷右領軍衛將軍右屯衛大將軍昌州刺史右神武軍大將軍儀州團練使左金吾衛大將軍階州防禦使舒州防禦使宣州觀察使公天資高秀少工文藝蔚然照映宗室長而篤好經術親近師友諸儒多與之游

聚書至數千卷務實求是不為嫖誇晚節淡泊刻苦隱
約瞿眈之間啓手足於牖下恬漠而不亂初公在乾祐
寶元中學虞世南正書為大小學第一至和中上所屬
文八卷皆賜金帛敕書獎之濮安懿王判大宗正論公
文藝經術為宗子表儀召試學士院阮逸嘗教授秦宮
與公游好去官合流鎮寓詩焉公報答之逸率其僚數
輩屬和逸詩用漢書五行傳故事非所宜言為仇家所
告捕繫詔獄坐斥逐詩未抵公而事覺公猶以所善非

其人罰金由是杜門謝絕交游盡心於學其天文地理醫方書文武藝事無不通東平王蚤世事太夫人極於憂勤丁太夫人憂哀毀如不勝鄰里夜火公奉几筵以出不問家事叔父承祐家人避火繆置寶器於公輜重間弟克臻家人或匿之公家女奴與分焉公皆不知也事定其下相告於是逮治公與克臻公怡然對獄悉自誣伏傾囊償之具獄當罰金九斤詔奪三官頃之大宗正司訟公獄不直詔公具實公言火時所之誰不僥

偉有司求必得則失不辜者衆矣臣得罪不過失官也
然臣能鑄金亦未嘗用天子遣內侍馮宗道取其書鑄
作尚方不繆乃除其罪公因謝病乞致仕僦宅外居於
是賜昭德坊許公拆洗院為居第不聽公家居數上封
事言所聞民間疾苦慮或壅於上聞天子嘉納之元豐
末撰次東平王遺藁奏之手詔中書門下曰承幹父子
世有藝文在朝廷旌善與能之義宜舉褒典於是啓東
平之封公舍中有藥圃蓋十年嘗在至命子弟淪茗而

已退朝燕坐不覲婦女繩牀之下足跡隱然未嘗過宗
室飲不言有無祿賜入門親黨之貧者待之以炊及公
捐館舍家無餘貲子叔盎貸俸錢以奉窀穸如公可謂
好學樂施刻意尚行不溺於流俗者也前史稱河間獻
王大雅卓爾不羣公視河間豈有愧乎公享年六十有
九計聞贈開府儀同三司追封和國公夫人夏氏先公
沒三十餘年五男子在者三人叔盎右武衛大將軍康
州團練使叔城叔鯤皆左班殿直二女子皆嫁世家孫

男九人庭堅與公皆姻連盛文肅公以故知公言行曲折謹狀公世出官狀在邦居家訖于牖下請上考功太常議所謚上國史院重編錄狀上

右皆家傳

山谷別集卷八

欽定四庫全書

山谷別集卷九

宋 黃庭堅 撰

墓誌銘

宋故通直郎河東轉運司勾當公事蕭君子長墓
誌銘

治平四年庭堅初仕得葉縣尉與同年生湖口主簿何
君表郊社齋郎蕭子長同歸江南登高臨遠把酒賦詩

忘道塗之勞也此時子長年尚少器宇堪事矣後十年見於清江則老成重慎無少年氣矣又十年見於京師宦游雖不偶而氣不挫也又十年庭堅謫在楚道會新天子即位恩許東歸而聞子長沒於河東矣子長新塗蕭氏也諱景脩曾大父漢卿大父中師父訪皆隱於田間子長舉進士有聲而用妻父提點江西刑獄何若谷奏補官調臨賀尉以母憂去再調吉州司戶叅軍以父憂去調平南令改宣義郎知符離縣從辟為河東轉運

司勾當公事泛恩遷通直郎元符三年七月卒於官次
享年五十有六子長毀瘠喪祭盡力既免喪弟兄欲析
產而悉推與之為吏不苟簡必令中法律得民情以算
捕盜或踰年盜不發獄屢空淮泗多蝗而獨不害其稼
決獄求生之蓋嘗再活死者其遇不便民事雖觸忌諱
不苟止必直乃已不憚大吏也故其進官陵遲也如子
長者才未試志不伸屈在下位死於中年是可哀也已
故譔而銘之夫人何氏先子長五年卒子之彥之方皆

舉進士之純之邵蚤卒其二尚幼三女既嫁陳嶠徐詰
其一在室之彥奉君及何夫人之喪合葬於其縣之雞
冠山祖塋之次實崇寧之癸未其仲冬之丙寅也銘曰

平居秩秩晬乎其不忤物遇事憤發矯乎其不可屈視

其能

一作才

也將有上觀其文也

一本無二也字

將有述忽乎其顛

作土室後千萬年見白日吾以斯文吐其鬱

一作鬱鬱

朝請郎郭方進墓誌銘

君諱大昕字方進臨邛火井人至君之父諱紘聚徒教

授於富義因家焉其家世傳初非火井人唐汾陽郡王子儀之曾孫景初為成都雙流令卒官下其子不能歸以其屬居臨邛中世在田間失譜不知至君幾世矣君既通籍故父以承事郎致仕累贈朝請郎君幼少機警能文故韓獻肅公守成都大興學學者至數千試進士以泮宮服淮夷賦君年十六考第一名聲傾西州登進士科調遂州法曹參軍以憂去服除授戎州司戶參軍果州團練判官提舉常平司辟資州軍事判官凝蜀人

不得同郡格復歸果州遷宣德郎知成都縣泛恩遷奉
議郎賜五品服以能舉再任元祐初政君以議法忤吏
者移蜀州永康縣遷承議郎通判達州中外諸公交章
薦其材而君以朝議君春秋高願得學官以便養乃除
梓州教授未至官而親捐館舍服除除泰州教授從陸
師閔辟以朝奉郎充陝西路買馬司勾當公事遷朝散
郎知蜀州泛恩遷朝請郎卒于郡之正寢享年五十有
六夫人榮州王氏封長樂縣君五男子曰純中三以鄉

書貢於禮部曰知十以奉表賀登極授郊社齋郎曰旅
百曰已千曰時萬皆有文藝二女子適進士程萬里程
撫有家集三十卷君好學未嘗一日去書不觀敏於文
詞草刻移檄操筆立成事從言順果州比歲水害民田
畜廬舍君檄嘉陵江而祠之在官四年江水平人傳其
書似韓潮州移鱷魚文云其令成都忤使者而移永康
士大夫以為曲在使者而不在君事親盡志居喪盡情
教士忠慤直學雅言不使阿世幸得治民平易以禮以

律不為巧發奇中稱人之善覆人之過喜怒不見於顏
有同母異父兄劉復性辯急十事七八不可意君事之
順焉在蜀州士多從之學賴君而活者至不可勝數其
啓手足召諸子教誨丁寧加跌膝上而逝其死生之際
知之者乎諸孤奉君之喪葬於富義之西林乃以知縣
事張剛狀君家世治行來求銘某於君皆治平四年進
士也純中又從予游剛西州名士也故序其可傳後者
為銘君蓋卒以元符三年八月己酉而葬以某年十二

月甲子銘曰

嗚呼方進仁而多聞宜壽宜祉以介其子天畀其施能
不見世中襲膚美非此其身在其子孫蓋物常理我作
銘詩以小觀大以詔無止

承議郎致仕李府君墓銘

府君諱某字子平姓李氏惟安陸之李不能紀其所從
來蓋有上世為安陸人興於田間遂以資長雄其州府
君之父諱惟清有陰德於其鄉府君晚生蚤孤而器宇

閱深化居微物不赫赫驚人坐致鉅萬性無偏嗜甚翫
樂信樂義喜推有餘補不足其天資也皇祐中歲大艱
通判州事黃師旦以令勸分府君為之率人爭應令既
而大疫死者橫道又皆為之槥櫝師旦罷官去他日道
出安陸路旁得孤棄窮獨者數十人與之俱來使人召
府君付之曰非君誰能活之府君欣然如受賜也平居
視歲之盈虛常上下穀價貴入而賤出民仰之以不憂
未嘗乘人之急賤取人田故敗家之田多歸李氏有里

姥善為生無子而夫不肖來託黃金一篋請密藏願勿
言久之姥夫病且死府君召證佐還之姥初驚曰無有
府君不應答姥乃笑曰公大人不受我私老妾晚納一
夫惰游不作業以為盡於飲博不若助公施尚可活數
百人府君曰物固有幸不幸與人居老矣又忍欺之而
死乎姥乃泣謝聞者皆歎息之方是時年三十餘矣諸
子稍長乃命次子謀儒治家第三子通儒就學已而皆
如意士大夫亦服其知人通儒蓋登熙寧六年進士第

府君及見其子為朝奉大夫開封府推官府君既以承
議郎就第而大夫君請以所賜緋銀魚回授出入里中
人歆羨之為人強壯未嘗問醫藥耆艾不用杖扶食生
飲冷如少年年八十有三乃終蓋元符三年府君七子
宗儒早卒長子道儒次則謀儒次則大夫君次師儒純
儒景儒葬府君於其縣之進賢里青木之原夫人趙氏
追封壽光縣君繼室閻氏追封永寧縣君皆祔焉實某
年某月日府君五女以序嫁進士鄭槃俞橐王洄其二

在室孫男女二十有三人曾孫女十有八人其婚嫁皆擇門戶問家法不問富也大夫君之子惇妻庭堅之兄女以婚姻故來乞銘銘曰

富者怨之府補貧振窶使得理所君以譽處盈者道之忌挹茲注彼來亦不已君以傳世薰然慈仁有子似之匪其身之繁其子孫而安樂之太平之鄉進賢之里青木之原葬從先子

通直郎張修孺墓銘

君諱公邵修孺字也蜀州江原人自其上世傳為漢留
文成侯張良之遠孫良之侯於留傳國至子不疑坐與
門大夫殺故楚內史而國除家稍湮替至皓為漢司空
又顯於良為六世孫實興於健為武陽葬於河南皓子
綱為御史在漢安時所遣八使中上奏梁冀有無君之
心凡十五事冀以為言直不敢害出為廣陵太守有異
政卒廣陵而歸葬健為其後絕譜君之居江原六世矣
曾大父延禕大父文正皆不仕父中理郡中推其學行

舉遺逸不起就拜將作監主簿累贈太常博士生七子
皆舉進士入仕者五人長公裕最知名君於兄弟中號
為孝友才器能任事而得仕最晚初調昌州大足縣尉
舉瀘州瀘川縣主簿閬州蒼溪令用提舉茶事程之邵
舉遂州觀察支使知雅州名山縣改通直郎知廬山縣
以紹聖四年十月丙戌卒于家享年六十八卒之明日
廬山勅乃下君雖在下位過事不姑息務盡道理以律
令與民情權其重輕為佐以功歸於令為令以功與其

佐其摘吏姦伏不可請賕請民逋負不可沮止皆有事實至今大足瀘川間吏民能道之君在官不疚於業遇物之智有餘常先見其盈虛有化有居已而富十倍然能用其材不似富賈人入而不出卹孤撫貧甚有恩意蜀中賢士大夫常以君視朝中貴人以為誰之不如而不耦如此未嘗不歎息也夫人勾氏唐安先生某人之女能儉能勤族人宜之寶配令德不幸後君三年亦卒二男曰澥曰湜一女嫁新神泉令李某將以某年某月

某日舉君及勾夫人之喪葬於其縣之清陽鄉太常之墓次而來乞銘銘曰

齷齪小謹於民為瘼乾沒大侵挾吏為姦乘時射勢
得名得位吁嗟惟君以民論法法不得病民以廉御
吏吏不得病民仕不州縣其又誰怨其小者試於已
然其大者齋以下泉我銘其丘以告萬年

潘處士墓銘

處士諱萃字信夫享年七十有二其先河南潘氏有諱

季荀者仕唐昭宗為太僕卿兼御史中丞五嶺催勸使
行部至長樂愛其山水而家焉太僕生仁杲為殿中丞
世亂王氏擅閩粵皆家居不宦游殿中生吉甫入朝為
國子博士贈工部侍郎工部生衢為屯田郎治數郡有
聲其甥劉彝嘗稱其外家政事雖古之良吏不能遠過
也蓋嘗通判黃州子孫遂不能歸也屯田實生處士嘗
舉進士不能受有司繩墨因棄去當以父任得官又推
與其弟獨浮沈酒間與人無貴賤皆去畦畛赴人急難

不遺力也人或怒罵與絕從而謝之傾倒不留纖介昆
弟破散父時貲產至無一錢處士未嘗以為言其處憂
患如舟人安於水未嘗險焉娶國子博士李餘慶之女
有才智能殖其家故處士落魄而不困生六男子鯁吉
州軍事推官幼子祖述吉水尉仲丙叔匪季原皆舉進
士而匪早卒二女子嫁著作郎羅紹黃岡尉萬淵孫男
十有四人曾孫男女三人處士卒以元祐二年六月某
甲子葬以某年八月某甲子兆于黃岡之方步原李夫

人附焉處士孫大臨有藝學與予游狀處士平生來乞
銘曰將坎石于墓前遂為銘曰

不駸駸於欲得與世異邪彞酒而不溺於酒不彫而有特
操邪取予喜怒若過而皆得情而不校邪世故不驚其
胷次年者而不耄邪可為智者言而難為俗人道邪

章處士墓銘

餘干章公弼狀其大父平生來告曰維大父少孤自重
居鄉黨有所不為與人立然諾不能容人之惡務於衆

人中辱之得其折服後遇之如骨肉治家如官府視瞻
無邪言行有物歲饑里中閉糴獨發廩取中價年七十
致家事浩然肆志往來江湖林嶺間二十年不知其所
以養心之術但見其臨世故逆順常自得也元豐八年
七月庚戌寐不以時興家人起視之則終矣實壽九十
有二公弼之父哀不勝喪故使公弼來乞銘公弼好學
有文擇士而交吾友李滌德素與之游舊矣故予銘處
士諱應全字保之三世而上丘墓與予隣邑祖淑父文

初不出田間今葬餘干之冤山夫人魏氏前沒三十有四年子元昶元徹早卒元長公弼之父也季曰元忠女子嫁史實曹僅史君卿董弼周彥孫十有七人曾孫三十有八玄孫二十有五元長事親孝能奉治命喪不受賻葬不踰禮既作冤山甘露降松竹其揜坎用元祐元年十月丙午銘曰

維此冕山毓竹與松小藏固安維子孝恭不疾者已不爭者彼其他也不懼吾知以此遺其來雲有墓孔云圖

銘不朽有孫孔文

青陽希古墓銘

君諱簡字希古井研之青陽氏也青陽氏本洛陽唐末
有尚書虞部郎中某者官於蜀中原亂不能歸留居井
研煮鹽為富人自虞部至君八世矣凡巴蜀之青陽皆
以井研為宗云君曾大父寶大父暘父倚皆晏安於富
饒不求宦達至君始築書館使子弟皆就學門無留賓
終日奕棋飲酒未嘗有倦客之色內外族姻待之以炊

者數十家或以偽券取其金君與金而焚其券或為君
行錢而負之君折其券終善遇之好讀史書每為客道
前世成敗古人賢不肖疊疊然不倦又好讀律能通法
意鄉鄰訟者多決於君君為道如是可如是不可多以
君言解而不爭常為書遺子孫曰禮士當盡心卹貧當
盡力公法不可不畏租賦不可不時斗斛權衡入十二
而出十九此富家之常必有餘殃在子孫汝輩不可不
戒觀其言可知其智矣享年七十有九人猶以為不壽

娶員氏生四男曰升賁孚革四女皆擇人而歸之後娶黃氏君卒以元祐五年之仲夏而葬以元符三年之仲冬其壟在虎頭山銘曰

顯兄希古氏青陽無爵于朝德於鄉富屋賓至龜縮藏君門日闢延四方舉棋行酒笑滿堂力耕無年是無傷孫曾秀孝列鴈行不嬉于廛學于黌虎頭山前松柏蒼後將築宮隧虎羊

史端臣先生墓銘

闕

也諱直躬以禮義處鄉黨壽六十而卒後十五年其子天常乃克寃宐之事而來乞銘維史氏世有版於眉山去朝廷遠習聞五代亂離其豪俊伏匿田間不樂仕宦淳化咸平七年之間李順王均再亂蜀土豪右族姓一切被害以軍職羈縻用其財史氏悉散其倉廩而自匿不汙其亂以義節稱鄉里有諱襲者及其弟襄皆登進士第人以為史氏實有陰功隱德而褒仕至屯田員外郎贈其父昌遂大理寺丞端臣大

理之孫屯田之子也直已自行不以秋毫挫於人而在
親側能致其孝居喪能致其哀屯田耿介在官不聽子
弟到官舍惟端臣以寡過得從容問寢膳其居里中卹
內外族姻之孤恩施有終始不幸而病緩五年而後沒
將沒之歲作詩喻其子以死生之說夫人成氏亦有賢
行後端臣九年亦卒天常有氣節以經術授諸生多有
登科者其丘在青衣之連珠岡大理君之塋次其藏以
元符三年十一月丙午銘曰

深耕疾耘有不逢年力義力仁卒老于田孝悌任恤
是亦為政連珠之丘來者致敬

右皆得之家傳

宋故南陽黃府君夫人溫氏墓誌銘

夫人太原溫氏南陽主簿字夢升之配也年若干歸於
我家事尊章應禮在等夷不爭接幼少慈惠遇使令款
曲夢升豪氣藐四海下筆成文章貫穿百家事辭妙見
萬物情狀在南陽時自以身與闕茸俯仰心莢琰如含
飯欲噦平生與歐陽文忠公友善而文忠公譴逐奔走

夷陵乾德間不能有益夢升徒啣沫相哀會陽夏謝希
深來守鄧歎賞其才異甚納以禮意夢升亦自以得知
已晚方盡書平生所為文歸之不幸希深下世夢升懷
藁書火於樞前哭不任其聲數日夢升亦捐館舍享年
才四十二夫人懷保抱攜歸葬故郡難苦淡薄綿四十
年無以家而不愠若將墜而不悔及見子庾孫公登器
仕籍而終其生以咸平庾子其沒以元豐癸亥子男四
人齊敦庾燮敦蚤世庾假承務郎女二人嫁通直郎余

宣試將作監主簿南宮日休孫男十人公器宣德郎知
衡州常寧縣公才公槩車公範軒公弼公介公準皆讀
書女若干人夫人家鄂之崇陽父諱可賢夢升諱注沒
之歲某月某甲子兆于巉田之吉卜叔父謂某曰吾與
庾變公器等謀銘先夫人莫宜於汝某哭再拜而銘銘
曰

百夫之雄憤世而傾棄捐嫠嬰惠柔之嫠雛
養懷綳迄觀厥成終歿吾世不慙不侵以好

其德音築丘嶠田其原撫撫安樂永久當身不離
福祿在爾後萬家置守謂我不信迨其興也則莫

余敢侮

右家藏
真蹟

黃氏夫人墓銘

夫人豫章黃亞夫之女天資婉孌似不能言而婦功
女德姑姊妹皆稱述之蚤孤能甘貧賤年二十母壽
光李夫人以嫁進士陳槩叔武相其夫以義未嘗言
家貧仕晚也事其姑樂夫人樂夫人學問明智常稱

夫人事我如我事先姑也不幸早世年三十有三樂
夫人哭之甚哀一男子曰騫未免於懷樂夫人力教
之今幸能知書夫人沒後五年樂夫人捐館舍叔武
乃克祔夫人於淮安之原先姑之墓次使騫來請銘
曰夫人視予同母兄也於是壽光夫人年七十有二
矣哀念夫人如新故勒銘以寄哀

怡聲柔色升堂饋食齊莊吉蠲于祖籩豆近賢遠
恥相其夫子宜壽而祿乃逢不若宜壽者已不若

者天從姑卜宅安固萬年

右有石刻

程氏夫人墓銘

夫人程氏父宇青神人年十四歸同縣蔡君謨永舅之黨皆稱其能敬姑之黨皆稱其能順閨闈中事雖巾幘間亦得其所持舅姑之喪也能敬能哀同里皆慕悅之夫死而三男三女未嫁娶夫人能儉能勤立蔡氏之門戶斥賣筭珥命子祥蕃息之祥奉承家政無秋毫不闕夫人以是二十餘年而蔡氏為戎州富

室同里無與爭長者家富矣命諸孫無敢不學故其
孫梅楫同時與薦書而楫相桓權桐椿輩皆好文學
享年七十有二其沒於紹聖之元八月某甲子其葬
於元符之末十一月某甲子其壟在南溪之鐵盤山
從其夫之兆也三男子長則祥次高次祺三女二蚤
卒其季壻曰陳章初夫人之王舅贊避王均之亂者
於荆楚數年乃歸其伯父王某不悅曰汝等恐懼則
輕去鄉里安樂則來同生貲乎贊性剛因盡推其財

策杖來客於黠道夫人之父曰本歸蔡氏為其富也今則窶子又何從焉夫人辭曰為蔡家婦大人命也死生同之況貧富乎嗚呼可謂賢矣夫人之孫相從予學其言行可親也因以眉山石君澥狀夫人之本末來乞銘擇其可傳後者為誌而銘之銘曰

被服祈祈采饋于堂族姍粲然賀其尊章骨立癯癯執喪于室鄰里焦然憂以毀滅前富後貧不二其初訖于既富勤儉不渝南溪之岡毓

松與柏伐山作宮壽歲千百勒銘瘞中用詔無
期孫曾其興德源在茲

墓表

蔡致遠墓表

有宋族姓子能自拔於俗盡心於學其作文能不溺於
俗盡功於奇死年二十六不遂其志青衣蔡致遠之墓
周景和墓表

有宋唐安山川之秀氣幼而能古文長而有立志不幸

年二十而沒不盡其才晉原周君景和之墓

新津周君無悔墓表

有宋近親受寄其母之財匿不償而君不訟諸兄共析其父之田多自與而君不爭賢哉新津周君無悔之墓

李君德元墓表

有宋讀書知行其教子能命以義言純師行純表李君德元之墓道

楊君希節墓表

卷九
鳴呼有宋擇里處仁教子以義四方游士以為依歸青
神楊君希節之墓

成都趙夫人墓表

成都范祖堯之母趙夫人幼孤而知詩書蚤孀而能禮
義斥簪珥以教其子叔求異炊而不爭財可謂母儀婦
師者耶眉山張剛名其坎曰海廩山磨誓義不渝嗚呼
夫人之事夫天曠地遠倚門而死哀哉夫人之教子江
南老人曰嘻盡之矣故書以表夫人之墓道俾來者致

恭焉

智氏夫人墓表

有宋能貧學以詩禮授其二子綱鎮鎮文亦奇智氏夫人之墓道

崇德縣君司馬氏夫人墓表

有宋能脫簪珥資其夫入太學遂成其名不幸年二十四歲而死崇德縣君司馬氏之墓

宋氏夫人墓表

有宋為妻能令為母能慈生子堂發逢皆好文學龍游
宋氏夫人之墓

呂夫人墓表

有宋五子出家一子為人天師摩耶同願力開封呂氏
夫人之墓

唐元夫墓表

有宋力生勤家不以累二弟使皆從進士承顏養志盡
孝於後母使慈之如已出唐元夫之墓

右有
石刻



山谷別集卷九